



# KOPI PAHIT

KAFI (Kesatuan Aksi Pelajar-pelajar Sekolah Tinggi Indonesia) telah menuntut kerajaan Indonesia menyiarkan bilangan isteri Presiden Soekarno yang sebenar. Jawabnya tentu tidak payah sebab Soekarno tentu tidak berani beristeri lebih dari empat tetapi kalau ‘isteri-isteri’ *Wa Allāhu a'lām* – ini sukar dikira kerana semua orang tahu Soekarno XXX wanita. Jadi adakah yamg dimaksud ‘KAFI’ – “isteri-isterinya”?

\* \* \*

Golongan PAS di dalam soal Sarawak nampaknya telah menyertai pihak-pihak kiri untuk membangkang satu pindaan perlembagaan mengenai kuasa gabenor di Sarawak. Orang-orang PAS patutnya ingat bahawa orang-orang sosialis telah merosakkan perjuangan Masyumi di Indonesia di dalam masa bekerjasama. Sebab itu menyertainya kurang bijak. Bukankah kalau berkecuali lebih baik?

\* \* \*

Siaran-siaran menghendaki pegawai-pegawai masjid di seluruh Republik Singapura diminta memberi kenyataan mengenai masjid, rekod imam-imamnya, dan pegawai-pegawaiannya telah dihantarkan ke merata masjid-masjid di Republik Singapura ini – sebelum Majlis Islam ditubuhkan. Ada orang bertanya : “Apa maksud dan tujuannya?” Sudah terang tidak payah bersuluh! Orang-orang di dalam yang dahulunya mengaku akan

bertanggungjawab: Sekarang tutup mulut. Boleh jadi kerana periuk nasi. Inilah orang beragama Islam dan mengaku berjihad kepada agama. Siapa dia. Tahu sama tahu sudahlah!

\* \* \*

(A) Muhammad Rais Bin Muhammad, nazir sekolah-sekolah agama Perak “merungut” bahawa sekalipun tiap-tiap tahun berpuluhan-puluhan ribu orang murid lulus peperiksaan persekolahan mereka masjid-masjid dan surau-surau masih juga kosong. Lulus peperiksaan dan ijazah apa pun tidak menjadi alasan untuk memakmurkan masjid atau surau dengan jemaahnya tetapi anjuran, galakan dan latihan mestilah dibuat jangankan dari sekolah-sekolah umum, Kolej Islam yang di Klang berhadapan dengan masjid, penuntut-penuntut dan guru-guru di kolej itu tidak datang berjemaah subuh di masjid yang dihadapannya – adakah mereka kelak diharap untuk memakmurkan masjid? Tak percaya datanglah ke Klang!

\* \* \*

Hakim Mahkamah Syariah Taiping Tuan Haji Yahya Bin Haji Muhammad, mengingatkan bahawa musuh-musuh Islam sedang menjalankan usaha mereka dengan bijak dan licin terutamanya melalui pelajaran dan pendidikan serta kesenian hingga kesannya telah banyak meresap ke dalam masyarakat kita bukannya hanya di bandar-bandar tetapi juga

di kampung-kampung. Semua ini tuan haji umum mengetahuinya. Soalnya sekarang di mana ada satu *group* yang bekerja untuk membendung kemaraan mereka dan usaha-usaha yang bekerja dan beramal untuk menyedarkan orang-orang kita. Bercakap sudah banyak tetapi amalannya tidak ada dan sebab itu mereka mara, kita habis dicakap sahaja. Mulakanlah berusaha dan beramal! Lebih baik daripada banyak bercakap.

\* \* \*

A. Hamzah Husin, pegawai penerangan studio filem Cathay Keris menyatakan bahawa kenduri senghaja<sup>1</sup> diadakan di keramat Habib Nuh untuk ambil berkat, semoga doa keramat itu menyedarkan dan menginsafkan para “playboy” yang lupa akan tanggungjawabnya. Kalau untuk ambil berkat dan doa – bukan tempatnya kerana mungkin doa terbalik kerana perbuatan maksiat jangan dicampur-campur dengan agama dan jangan cuba-cuba main-main agama.

\* \* \*

Tuan Haji Ya'kub Muhammad tatkala bercakap di dalam pembukaan Seminar Pendidikan Islam yang diadakan di Universiti Singapura di antaranya berharap bahawa seminar itu akan melahirkan satu kesimpulan bernilai dan tegas yang akan dapat dijadikan pertunjuk<sup>2</sup> bagi pertubuhan-pertubuhan Islam menurut jalan yang direndai Tuhan. Jalan yang direndai tuhan ialah menghukum dengan hukum yang diturunkan oleh Allah dan berani berkata dan menentang sesuatu hukum yang dijalankan bertentangan dengan hukum Allah. Kalau masih mahu melembutkan gigi dari lidahnya kerana sesuatu buat diri – tentunya bukan jalan yang direndai oleh Allah!

- Cemeti al-Farouk

<sup>1</sup> kesalahan pada ejaan, Sepatutnya sengaja

<sup>2</sup> ejaan sekarang pertunjuk